

starogradski

OPĆINA STARI GRAD
SARAJEVO



MUNICIPALITY OF STARI
GRAD SARAJEVO

haber

BESPLATAN PRIMJERAK • MAJ, 2023, broj 57.

**Gradi se spomen
obilježje šehidima
Starog Grada**

- 2-4 Obilježavanje 02. maja,
Dana Općine Stari Grad
- 6-7 Općina po evropskim
standardima
- 10-13 Projekti
- 14-17 Podrška humanitarnim
organizacijama
- 18-19 Obrazovanje
- 20-21 Podrška sportistima i
penzionerima



Impressum

- Izdavač:** Općina Stari Grad
Sarajevo
- Pripremili:** Almedina Porča
Alma Imamović
Jasenko Jašarević
Nedim Šahović
- DTP:** Safet Mališević
- Fotografije:** Nedim Šahović
- Štampa:** Štampanija Fojnica d.d.
Fojnica
- Tiraž:** 3000
- Adresa:** Zelenih beretki br. 4
71000 Sarajevo
- web:** www.starigrad.ba
- e-mail:** info@starigrad.ba
- Telefon:** +387 33 282 491



Dan Općine



Svečano obilježen 02.maj, Dan Općine Stari Grad

Najviše priznanje Zlatni sebilj za reisu-l-ulemu Huseina ef. Kavazovića
● Brojne delegacije pobratimskih općina uveličale proslavu ● Obilazak
mezara sarajevskih velikana

Povodom 02.maja, Dana Općine Stari Grad, u prisustvu velikog broja uglednih zvanica u Bošnjačkom institutu održana je Svečana sjednica uz prigodan program i dodjelu priznanja.

Najviše priznanje Općine Stari Grad - Zlatni sebilj, općinski načelnik Ibrahim Hadžibajrić uručio je reisu-l-ulemi Islamske zajednice u Bosni i Hercegovini Huseinu efendiji Kavazoviću. Priznanje je reisu Kavazoviću pripalo za naročit doprinos u razvoju međunarodnih i međuljudskih odnosa na načelima solidarnosti, demokratičnosti, humanosti i tolerancije među ljudima.

Kako je kazao načelnik Hadžibajrić, Općina Stari Grad Sarajevo je pokretač projekata i dobrih primjera u Kantonu Sarajevo, a među njima je svakako i isticanje pojedinaca i kolektiva zaslužnih za afirmaciju Općine, ali i države Bosne i Hercegovine.

„U ovim teškim vremenima moramo pokazivati više privrženosti i odgovornosti ne samo prema Starom Gradu, već i Kantonu Sarajevo, ali i Državi Bosni i Hercegovini. Ne smijemo prodavati ono što smo skupo krvlju platili u periodu agresije na našu zemlju i dovesti se u istu poziciju kao u periodu od 1992. do 1995. godine. Da su se ostvarili ciljevi agresora, mi zasigurno ne bismo bili danas ovdje“, poručio je načelnik Hadžibajrić.



Priznanja i zahvalnice dodijeljene najistaknutijim pojedincima i kolektivima



Reis Kavazović dobitnik najvećeg priznanja

Reis Kavazović: Priznanje je obaveza da se u budućnosti više založim za na- predak Starog Grada

Reisu-l-ulema Husein efendija Kavazović se zahvalio za uručeno priznanje kazavši da je velika čast biti izabran među stotinama građana Staroga Grada. "Stari Grad je utisnuo svoj pečat



Veliki broj uglednih zvanica

u vremenu i prostoru. Pitamo se šta bi Bosna bila bez Sarajeva, a Sarajevo bez Starog Grada, Baščaršije, Sebilja, džamija, sinagoga, crkva i katedrala. Sarajevo je nastalo ovdje u Starom Gradu kao dobro djelo, kao vakuf u čemu jeste njegova kobna vrijednost i nepotrošena blagodat. Izdržljivost ovog grada u nesreći sa kojom se suočio vagana je na mnogim svjetskim vagama, političkim, idološkim i vjerskim. To vaganje još uvijek traje. Priznanje 'Zlatni sebilj' doživljavam kao obavezu u budućnosti, da se lično i još više založim za napredak Starog Grada, Sarajeva i cijele zajednice u cjelini", istakao je u svom govoru reisu



Priznanja uručena na Svečanoj sjednici

efendija Kavazović.

Predsjedavajući Općinskog vijeća Stari Grad Seid Škaljić podsjetio da je Općinsko vijeće Stari Grad još davne 2001. godine usvojilo prijedlog da se 02. maj obilježava kao Dan Općine Stari Grad. „Taj datum predstavlja prekretnicu za Stari Grad, Sarajevo, a samim tim i Bosnu i Hercegovinu. Agresorske snage su 02. maja, 1992. godine pokušale zauzeti zgradu Predsjedništva RBiH, a zahvaljujući hrabrim građanima ovog grada spriječen je taj pokušaj. Danas Općina Stari Grad predstavlja mjesto susreta i okupljanja,” poručio je predsjedavajući Škaljić. Dodao je da Općinsko vijeće

Dan Općine

Stari Grad pokazuje visok stepen zrelosti i odgovornosti prema svojoj zajednici usko saradujući sa općinskim načelnikom Ibrahimom Hadžibajrićem i općinskim službama.

Priznanja za afirmaciju Općine Stari Grad i Bosne i Hercegovine

Pored priznanja Zlatni sebilj, na svečanoj sjednici uručena su i ostala najviša priznanja za pojedince i kolektive.

Općinska povelja sa zlatnim štitom pripala je penzionisanom generalu i Zlatnom ljljanu ARBiH Ismetu Hadžiću Muteveliji, kao i Udruženju „Maloljetni borci“ Općine Stari Grad Sarajevo. Za izuzetan doprinos u oblasti sporta Povelja sa grbom Općine Stari Grad dodijeljena je legendarnom fudbaleru i treneru FK „Sarajevo“ Mehmedu Janjošu Čali, a isto priznanje dobio je i karatista iz Starog Grada Hamza Turulja, jedan od najboljih mladih sportista u BiH. Priznanje „Policajac godine“ dobio je Aldin Bešlija. Priznanja su im uručili predsjedavajući Škaljić i njegov zamjenik Damir Saračević.

Dopredsjedavajući Općinskog vijeća Zlatan Ljuhar i općinske vijećnice Merima Arnautović i Emina Kiseljaković uručile su posebne zahvalnice za doprinos u promovisanju i razvoju Općine Stari Grad pojedincima i kolektivima. Priznanja su dobili Mahir Selmanović (voditelj Centra za promociju i unapređenje zdravlja Općine Stari Grad), Karate klub „Satori“, Edin Čomaga (bivši pripadnik ARBiH), Mustafa Agić (maloljetni borac), Tarik Fočo (policajski službenik PU Stari Grad), GSS FBiH i GSS – Stanica Sarajevo, Ekrem Herenda (bivši pripadnik ARBiH), GSS FBiH, Milka Grebenar i Ramiz Nukić (posthumno)

Sjednici su prisustvovali predstavnici drugih institucija, boračkih i građanskih udruženja, posebni gosti su bile delegacije pobratimskih općina i gradova iz regiona i Republike Turske: Opština Karpoš Skopje, Grad Makarska, Grad Kragujevac, Općina Selçuklu Konya, Općina Karşıyaka Izmir, Općina Ulcinj, Općina Osmangazi Bursa i Opština Ohrid.



Na Kovačima odata počast šehidima i prvom predsjedniku Aliji Izetbegoviću



Vijećnici na obilježavanju 02. maja, Dana Općine

Obilazak mezara sarajevskih velikana

Obilaskom mezara utemeljitelja Sarajeva Isa-bega Ishakovića u Carevoj džamiji, turbeta najvećeg sarajevskog vakifa Gazi Husrev-bega u haremu Gazi Husrev-begove džamije i Šehidskog mezarja Kovači, delegacija Općine Stari Grad, predvođena općinskim načelnikom Ibrahimom Hadžibajrićem, ukazano je ne samo na značaj 02.maja, nego i svih onih koji su stvarali i branili Stari Grad kroz prošlost i doprinijeli da on danas bude ovo što jeste.

U haremu Careve džamije delegaciju Općine Stari Grad je dočekaio Sadrudin ef.Išerić, a u haremu Gazi Husrev-begove džamije hafiz Mensur ef. Malkić, prvi imam Begove džamije. „Drago mi je što na ovako značajan dan kakav je Dan Općine Stari Grad, načelnik Ibrahim

Hadžibajrić dođe sa delegacijom Općine Stari Grad, zijarete i posjećuju turbe Gazi Husrev-bega. On je bio naš velikan, graditelj ove Baščaršije i on zaslužuje, uz utemeljitelja ovog grada Isa-bega Ishakovića da se spomene i da se obiđe. To svakako zaslužuju i naši šehidi, branitelji ove zemlje i rahmteli prvi predsjednik Alija Izetbegović. Arapska izreka kaže ‘Nema budućnosti narod koji ne bude vodio računa o svojim velikanima’, stoga se iskreno nadam da je pred svima nama svijetla budućnost, kao i budućnost ove naše Općine Stari Grad“, kazao je u svom obraćanju hafiz Mensur ef. Malkić.

U obilježavanje 02.maja uključili su se i članovi Udruženja maloljetnih boraca Stari Grad, kao i Jedinstvene organizacije boraca „Unija veterana Općine Stari Grad“ koji su odjeveni u svečane uniforme, uz delegaciju Općine Stari Grad, u svečanom defileu posjetili sve spomenute lokacije.

Nastavak saradnje pobratimskih Općina Stari Grad Sarajevo i Osmangazi Bursa

Dogovorena dva nova projekta - Osmangazi sufinansira Spomen park "Putevi vječnosti" – Stari Grad poklanja Bursi fontanu ispred Muzeja Panorama 1326

Delegacija Općine Stari Grad, i ove godine bila je počasni gost načelnika Općine Osmangazi Mustafe Dundara na obilježavanju Dana osvajanja Burse u okviru kojeg je organizovan svečani program uz nastup hora Mehter, a potom i defile od brda Tophane, gdje se nalazi kompleks u kojem su turbeta Osmana I - osnivača Osmanskog carstva i njegovog sina Orhana I - osvajača Burse, pa sve do Muzeja osvajanja Burse Panorama 1326. Također, održan je i stručni simpozij o historijskom značaju Osmana i njegovog sina, osvajača Orhana I.

Najznačajniji dan u historiji Općine Osmangazi, ali i grada Bursa, je dan kad su Osmanlije, predvođene Orhanom I, 1326.godine, osvojile Bursu. Taj datum Općina Osmangazi obilježava kao svoj dan nizom prigodnih svečanosti koje nisu izostale ni ove godine, ali su bile značajno reducirane usljed velike tragedije i razornih zemljotresa koji su pogodili zemlju.

Spomen obilježje pored Osmangazi Bursa sebilja

Istovremeno, jedan od najznačajnijih datuma u historiji Općine Stari Grad Sarajevo je 02.maj, 1992.godine kada su se vodile presudne bitke za grad Sarajevo, ali i opstojnost države Bosne i Hercegovine. Delegacija Općine Osmangazi, predvođena zamjenikom načelnika Husejinom Hasanom Erdonmezom prisustvovala je obilježavanju ovog značajnog datuma.

Ovi susreti bili su prilika da se dogovore novi projekti koje će pobratimske općine zajedno realizovati.

Općina Osmangazi Bursa će sufinansirati izgradnju Spomen parka 'Putevi vječnosti', na uglu ulica Bistrik i Isa-bega



Erdonmez i Hadžibajrić pored Osmangazi Bursa sebilja

Ishakovića, a gdje već postoji izgrađen Osmangazi Bursa Sebilj koji je ova općina poklonila građanima Starog Grada 2009. godine. Upravo iz tog razloga, pobratimska Općina Osmangazi želi dati svoj doprinos u uređenju kompletne lokacije, posebno imajući u vidu da se radi o spomen-obilježju koje će biti izgrađeno u čast svih šehida iz Starog Grada, iz perioda od 1992-1995. godine.

Koliko su čvrste pobratimske veze i prijateljski odnosi između ove dvije

općine najbolje pokazuju zajednički projekti. Općina Osmangazi je finansirala izgradnju Bakr-babine džamije i restauraciju arheološkog parka At mejdan, te sufinansirala rekonstrukciju Bašçaršijskog trga. Općina Stari Grad je pomogla izgradnju sebilja po uzoru na bašçaršijski sebilj u samom središtu Burse, a tokom nedavne posjete Bursi, načelnik Hadžibajrić je najavio da će Stari Grad u znak prijateljstva sagraditi fontanu ispred čuvenog Muzeja Panorama 1326 u Bursi.



Sebilj u Bursi

Natpis na Sebilju u Bursi

Novi projekat

Stari Grad – općina po evropskim standardima

Najavljena 4 kapitalna projekta: revitalizacija i rekonstrukcija Bazena Bentbaša, izgradnja spomen obilježja žrtvama masakra na Markalama, izgradnja Spomen parka "Putevi vječnosti" sa spomen obilježjem za šehide Starog Grada i idejni projekat podzemne garaže sa poslovnim objektom na Trgu Austrije



Stari Grad je poseban, drugačiji i prepoznatljiv. Ovo je mjesto gdje se na temeljima tradicije uspješno gradi budućnost. Ta budućnost uključuje viziju razvoja Starog Grada u modernu i uređenu lokalnu zajednicu po evropskim standardima.

Ovo je općina u kojoj se gradi, ulaže u obrazovanje, mlade, podstiču mali biznisi, čuvaju stari zanati. Općina koja je najtransparentnija u državi, koja je sagradila prvu javnu podzemnu garažu u Kantonu Sarajevo, koja privlači najveći broj turista u državi i ima razvijenu komunalnu, putnu, turističku infrastrukturu. Opredjeljenjem općinskog načelnika Ibrahima Hadžibajrića, Stari Grad će i u

budućnosti nastaviti da izrasta u općinu po evropskim standardima, stoga su u ovoj godini najavljena 4 kapitalna projekta.

Bazeni na Bentbaši se vraćaju građanima

“U ovoj godini ćemo raditi projekte i investicije u Starom Gradu vrijedne nekoliko miliona maraka. Najveći projekat, i to ne samo finansijski nego i sa sentimentalnom vrijednošću za naše građane je rekonstrukcija bazena Bentbaša. Nakon više od 120 godina od njihove izgradnje, vratit ćemo bazene građanima. Idejni projekat je završen i

on uključuje četiri otvorena bazena, jedan veliki i tri manja,” izjavio je načelnik Hadžibajrić.

Kompleks će uključivati i restoran, te tehničke prostorije, urede, recepciju, suvenirnicu, prostorije za presvlačenje, prostoriju za ambulantu, toalete. Dva manja bazena su predviđena za djecu i imat će prateće sadržaje, a predviđena je i izgradnja dječijeg parka i jednog pješačkog mosta preko Miljacke. Izgradnja bazena će koštati oko 7 miliona maraka i počet će u septembru ove godine. Općina Stari Grad je za sada dobila podršku od Vlade FBiH u iznosu od 1,5 miliona KM, a očekuje se da se uključe i drugi nivoi jer ovo je projekat od interesa za cijeli Kanton Sarajevo.

Izgradnja dva spomen-obilježja, da podsjećaju i opominju

Stari Grad je općina koja ljubomorno čuva i baštini svoju prošlost, kulturu i tradiciju, ne zaboravlja svoje heroje i šehide i brine o njihovim porodicama. Dostojanstveni spomenici šehidima kao i nevinim civilnim žrtvama agresije na našu zemlju koje će Stari Grad sagraditi u ovoj godini ostat će u amanet novim generacijama, da podsjećaju i opominju

“Veoma brzo počinjemo izgradnju Spomen parka Putevi vječnosti u blizini Careve džamije koji će uključivati spomen obilježje za sve šehide iz Starog Grada. Bit će to prvi jedinstveni spomenik za sve naše šehide iz perioda 1992-1995.godine na kojem će pisati imena svih 725 šehida iz Starog Grada, a projekat uključuje i popločanje i hortikulturno uređenje cijelog prostora,” izjavio je načelnik Hadžibajrić te dodao da će dio sredstava za ovaj projekat donirati pobratimska Općina Osmangazi iz Burse.

Osim toga, do 05.februara 2024.godine i godišnjice stravičnog zločina na pijaci Markale, Općina Stari Grad sagradit će novo spomen-obilježje za 68 nevino ubijenih civila 1994.godine. Te žrtve i njihove porodice zaslužuju dostojanstven spomenik pred kojim će ubuduće zastati svaki prolaznik, svaki posjetilac grada, gdje će se učiti nove generacije o onome što je preživio ovaj grad heroj u periodu agresije. “To je naš dug prema onima koji su dali svoje živote i njihovim porodicama,” kazao je Hadžibajrić.

Još jedna podzemna garaža i moderni poslovni objekat

U Stari Grad se dolazi da bi se uživalo i njegovim ljepotama, historiji, gastronomiji, a broj posjeta iz godine u godinu raste. Kako raste broj posjeta, tako rastu i potrebe posjetilaca, ali i građana, a među najvećim potrebama su parking prostori. Općina Stari Grad i načelnik Hadžibajrić misle i na to. Pored prve javne podzemne garaže koja je sagrađena prije tri godine u samom sru Starog Gra-



Spomen park Putevi vječnosti



Spomen obilježje na Markalama



Podzemna garaža na Trgu Austrije

da, preko puta Vijećnice, u najavi je još jedna u neposrednoj blizini.

“Podzemna garaža preko puta Vijećnice iz dana u dan dokazuje koliko je opravdana investicija. Naše strateško opredjeljenje je da povećavamo imovinu općine, te da uvećavamo prihode koje zatim usmjeravamo na projekte koji su od značaja za građane. Zato ćemo sagraditi još jednu podzemnu garažu na Trgu Austrije, a iznad nje će biti moderni poslovni objekat,” izjavio je načelnik. “Idejno rješenje smo već uradili. Ta garaža bi trebala imati 3 podzemne etaže i oko 212 parking mjesta. U poslovnom objektu na površini dovest ćemo u Stari Grad na-

jpoznatije svjetske brendove i taj lokalitet će postati mjesto okupljanja i brojnih sadržaja koje će ponuditi. Planiramo u ovoj godini završiti administrativne procedure, kako bi sljedeće godine počeli i ovaj projekat,” dodao je.

U općini Stari Grad sve je vrlo jasno i transparentno. Potvrđuju to i brojevi, utisci i emocije. Emocije i priče koje se tek trebaju ispričati. A svaka dobra, sarajevska priča počinje upravo iz Starog Grada. Konačno, raduje činjenica da će budućnost donijeti nastavak ulaganja i gradnje, pa će se sjaj prošlosti i tradicije ispreplitati s idejama koje dolaze, idejama evropskih standarda.

Općinsko vijeće

22. sjednica

Općinskog vijeća

Dvadeset i druga sjednica Općinskog vijeća Stari Grad Sarajevo koja je imala 13 tačaka dnevnog reda, održana je 26.01.2023. godine. Općinsko vijeće jednoglasno je donijelo zaključak kojim traži od Skupštine KS i Ministarstva komunalne privrede, infrastrukture, prostornog uređenja, građenja i zaštite okoliša KS hitno poduzimanje aktivnosti za izmjenu Odluke o zaštiti planinskih izvora vode za piće sarajevskog vodovodnog sistema i dijela otvorenog toka rijeke Mošćanice donesene 1997. godine.

“Predložio sam predsjedavajućem Općinskog vijeća Seidu Škaljiću da Općinsko vijeće donese zaključak kojim će se tražiti od Skupštine KS da ubrzaju rješavanje ovog pitanja i drago mi je što su vijećnici jednoglasno



Dobra saradnja vijećnika i općinskih službi

podržali. Mi smo pripremili sve što je potrebno i Skupština KS treba staviti

van snage dio sporne odluke kako bi se pristupilo legalizaciji objekata za koje su vlasnici predali zahtjeve do 2016. godine, dakle u zakonskom roku,” izjavio je nakon sjednice općinski načelnik mr. Ibrahim Hadžibajrić.

Također, na prijedlog općinskog načelnika Ibrahima Hadžibajrića Općinsko vijeće Stari Grad usvojilo i izmjene Pravilnika o dodjeli novčane pomoći djeci sa hroničnim oboljenjima i djece sa poteškoćama u razvoju. Izmjenama je omogućeno da pravo na novčanu pomoć ostvaruju lica s poteškoćama u razvoju bez obzira na godine života jer je u ranijem Pravilniku uočena neopravdanost starosnog ograničenja do 27 godina. Općinsko vijeće Stari Grad Sarajevo usvojilo je i Izvještaj o radu za 2022. godinu, te Program rada za 2023. godinu.

23. sjednica

Općinskog vijeća

Općinskom vijeću Stari Grad Sarajevo predočene su informacije o poduzetim radnjama na revitalizaciji Bazena Bentbaša. Istaknuto je da su uključene sve relevantne institucije i viši nivoi vlasti koji su prepoznali značaj ovih projekata, te dali svoju podršku, kao i da je u toku izrada studije izvodljivosti te aktivnosti na izradi finalnog Idejnog projekta kojim će biti ispoštovani svi zakonski propisi, te da će projekat prije izdavanja urbanističke saglasnosti biti prezentiran Općinskom vijeću Stari Grad Sarajevo. Vijećnicima je predočena i Informacija o poduzetim radnjama na redizajnu spomen-obilježja na pijaci Markale. Općinsko vijeće Stari Grad Sarajevo je na 23. redovnoj sjednici usvojilo i Odluku o izradi Strategije razvoja Općine Stari Grad Sarajevo za period od 2023-2027. godine.

Na ovoj sjednici za člana Općinske izborne komisije, Općinsko vijeće je izabralo i imenovalo Maju Bjelan Karičić, drugorangiranu kandidatkinju sa rang liste koju je dostavila Konkursna komisija u okviru Izvještaja o provedenoj proceduri za imenovanje člana OIK-a Stari Grad.



Predočene informacije o aktivnostima vezanim za revitalizaciju Bazena Bentbaša

24. sjednica

Općinskog vijeća

Na 24. redovnoj sjednici Općinskog vijeća Stari Grad Sarajevo, održanoj 30.03.2023. godine, usvojen je izvještaj o radu Pravobranilaštva Općine Stari Grad Sarajevo za 2022. godinu. Prema riječima predsjedavajućeg Općinskog vijeća Seida Škaljića, Općinsko pravobranilaštvo je pokazalo da radi kvalitetno i profesionalno.

“Usvojili smo izvještaj o radu Općinskog pravobranilaštva za 2022.godinu iz kojeg je vidljivo da Pravobranilaštvo kvalitetno radi, a riješeni su sporovi koji su trajali i po 13 godina. Građani mogu biti ponosni što je Pravobranilaštvo Općine Stari Grad u punom zamahu, radi i predstavlja općinu, a samim tim i građane, na najbolji način pred nadležnim sudovima,” izjavio je predsjedavajući Škaljić.

Općinsko vijeće Stari Grad na sjednici je većinom glasova usvo-



Predsjedavajući Seid Škaljić i dopredsjedavajući Zlatan Ljuhar

jilo i Izvještaj o realizaciji budžeta Općine Stari Grad Sarajevo za prošlu godinu koji je utvrđen u iznosu od 30.596.350,00 KM. Usvojen je i završni obračun budžeta za prošlu godinu, te prijedlog zaključka o davanju saglasnosti Općinskom načelniku na Prijedlog Pravilnika o vlastitim javnim prihodima Općine Stari Grad Sarajevo.

25. sjednica

Općinskog vijeća



Usvojen rebalans budžeta Općine Stari Grad

Općinsko vijeće Stari Grad Sarajevo jednoglasno je na 25. sjednici Općinskog vijeća podržalo rebalans budžeta Općine Stari Grad Sarajevo za 2023. godinu koji je predložio općinski načelnik Ibrahim Hadžibajrić. Rebalansom je predviđeno uvećanje budžeta

od 65%, odnosno za 13.583.100 KM, a što uključuje prenesena i namjenska sredstva, kao i grantove čiji priliv u budžet se očekuje u narednom periodu, kao što je, između ostalog, 1,5 miliona KM koje je Vlada FBiH odobrila za rekonstrukciju bazena Bentbaša.

Kako je pojasnio općinski načelnik Hadžibajrić, kroz rebalans su planirani značajni kapitalni projekti koji su u planu za ovu godinu, a najveći od njih je rekonstrukcija bazena Bentbaša koja će početi u septembru. Dodao je da su rebalansom uključena i sredstva koja će biti prebačena od strane Zavoda za izgradnju KS i Kantonalne uprave civilne zaštite u ukupnom iznosu od 356.300 KM, a sanirat će se klizišta Močila, Krka i Trčivode (dvije lokacije). Vijećnici su istakli da se radi i kvalitetno pripremljenom rebalansu i raspodjeli sredstava, a uvršteni su i svi amandmani koje su vijećnici predložili, dok su neki projekti koje su vijećnici predlagali na ranijim sjednicama, već bili uvršteni u rebalans, na čemu su se zahvalili općinskom načelniku.

Uvedena servisna usluga Viber Chat Bot za obavijesti o statusu predmeta



Usluga dostupna 24 sata dnevno

Svi građani koji ubuduće budu podnosili zahtjeve Općini Stari Grad Sarajevo moći će u svakom momentu znati status svog zahtjeva, odnosno upravnog ili vanupravnog postupka, ukoliko budu saglasni da primaju ovakve obavijesti i ostave svoje kontakt podatke. Poruke će građani dobijati putem vibera od momenta kada predmet bude primljen na obradu, a zatim i kroz sve ostale faze, odnosno promjene statusa predmeta.

Na ovaj način građani će u svakom momentu znati u kojoj je fazi njihov zahtjev, u kojoj službi i kod kojeg državnog službenika/namještenika je u obradi, da li se čeka mišljenje neke druge institucije i koje, da li je predmet odbačen, odbijen, obustavljen i, u konačnici riješen. Usluga će građanima biti dostupna 24 sata dnevno.



U svakom momentu provjera statusa predmeta

Građani će prilikom predavanja zahtjeva/predmeta na šalteru biti u obavezi da ispune izjavu kojom daju saglasnost za primanje ove vrste obavijesti, te ostave tačan broj mobitela na kojem imaju instaliranu viber aplikaciju. Osim toga, na službenoj web stranici Općine Stari Grad Sarajevo bit će dostupan Viber ChatBot link preko kojeg će građani također moći koristiti ovu servisnu uslugu. Broj provjera koje građani mogu napraviti po određenom predmetu je neograničen.

Projekti

Općina Stari Grad Sarajevo nastavlja ulaganje u putnu i komunalnu infrastrukturu

Urađena rekonstrukcija kanalizacije u ulicama Hladvode i Baruthana • Zamjena kanalizacije u ulici Arapova - Obnova ulica Nafije Sarajlić i Mejlijina • Sanacija dijela ulice Obhodža, te sanacija ivičnjaka u ulici Sagrdžije

Općina Stari Grad Sarajevo je uspješno nastavila realizaciju infrastrukturnih projekata za 2023. godinu, a među njima su i sanacije nekoliko ulica. Sanovnici ovih ulica sada imaju sigurniji i kvalitetniji pristup svojim domovima, što će im olakšati svakodnevni život.

Hladvode i Baruthana

U mjesnoj zajednici Mošćanica, u dijelovima ulica Hladvode i Baruthana urađena je rekonstrukcija separate kanalizacione mreže, čime su riješeni dugogodišnji problemi stanovnika sa zagađenjem i izljevanjima. Projekat je obuhvatio polaganje 760 metara novih cijevi za fekalni kanal i oborinsku odvodnju, kao i priključivanje svih okolnih domaćinstava na novu mrežu. Općinski načelnik Ibrahim Hadžibajrić je u budžetu planirao sredstva u iznosu od 600.000 KM za ovaj projekt nakon što su se građani obratili za pomoć.

Arapova

U mjesnoj zajednici Medrese u ulici Arapova, oko 25 domaćinstava dobilo je novu kanalizacionu mrežu, zahvaljujući velikom infrastrukturnom projektu koji je nedavno završen. Radovi su obuhvatili zamjenu stare kanalizacione mreže prošle godine, nakon čega je početkom ove godine asfaltirano preostalih 120 metara ove ulice. U sklopu radova, ugrađene su nove cijevi, uključujući 120 metara za fekalnu kanalizaciju i isto toliko za oborinsku odvodnju, a ukupni troškovi projekta iznosili su 190.000 KM.



Hladvode i Baruthana



Arapova

Mejlijina

Na zahtjev građana MZ Medrese, saniran je i obnovljen dio ulice Mejljina, od broja 10 do broja 19. Projekat je koštao oko 15.000 KM.

Nafije Sarajlić

Ulica Nafije Sarajlić u dužini od 159 metara obnovljena je postavljanjem asfalta umjesto dosadašnje kaldrme, nakon provedene ankete među stanovnicima. Projekat je koštao 41.300 KM, a uključivao je uklanjanje

dotrajale kaldrme te sanaciju oštećenja na ivičnjacima i trotoarima.

Sagrđžije

Realizovan je projekat sanacije ivičnjaka u ulici Sagrdžije u dužini od 180 metara s obje strane ulice, na dijelu od Bakijske džamije do ulice Čemerlina. Ulica se nalazi na području mjesne zajednice Logavina, te je frekventna dionica za automobile i pješake. Finansira se sredstvima iz budžeta Općine Stari Grad Sarajevo u iznosu od 29.000 KM, a cilj

je pješacima omogućiti lakše kretanje te spriječiti nepropisno parkiranje vozila.

Obhodža

Sanacija makadamskih dijelova ulice Obhodža u mjesnoj zajednici Moščanica omogućila je stanovnicima mnogo sigurniji i kvalitetniji pristup svojim domovima. Projekat je uključivao sanaciju i asfaltiranje dijela ulice od broja 16 do broja 24 i dijela od broja 21 do broja 27, a za radove je izdvojeno 38.000 KM.



Mejljina



Sagrđžije



Nafije Sarajlić



Obhodža

Projekti

Novi potporni zidovi u padinskim naseljima

Novi zid školskog dvorišta na Bistriku vrijedan 298.000 KM • Sanacija kamenih zidova i oštećenih potpornih konstrukcija

Općina Stari Grad Sarajevo nastavlja ulaganje u sigurnost svojih građana i nesmetano odvijanje saobraćaja u padinskim naseljima. U proteklom periodu, u više ulica na području općine Stari Grad Sarajevo, realizovani su projekti sanacije dotrajalih potpornih konstrukcija.

Bistrik

Na Bistriku, u školskom dvorištu Osnovne škole „Edhem Mulabdić“, sagrađen je novi potporni zid dužine 35 metara koji graniči sa veoma frekventnom ulicom Bistrik. Zbog velikog broja oštećenja, stari zid je srušen i na njegovom mjestu sagrađen novi potporni zid visine od 1,79 do 4,39 metara. Projekat izgradnje novog zida koštao je 298.700 KM, a zajedno su ga realizovali Općina Stari Grad Sarajevo i Ministarstvo za odgoj i obrazovanje Kantona Sarajevo. Ovaj novi zid vraća sigurnost učenicima, nastavnom osoblju, kao i velikom broju građana i vozila koji saobraćaju ulicom Bistrik.

Carina

U ulici Carina, od broja 33 do broja 51 na Vratniku, postojeći potporni zid uz veoma prometnu saobraćajnicu je saniran, jer je prijetio obrušavanjem na saobraćaj. Riječ je o vrlo frekventnom lokalitetu kojim svakodnevno prolazi veliki broj vozila, kao i javni gradski prevoz. Saniran je u dužini od 95 metara i prosječnoj visini tri metra, a za ove radove izdvojeno je 40.500 KM.

Baruthana

Na Mošćanici u ulici Baruthana broj 93, urađena je sanacija zida dužine 28 metara, visine 2,5 metra i širine 0,5 metara. Ova dionica je veoma frekventna i koristi se za putnički i pješački saobraćaj, pa je sanacija zida značajno doprinijela boljoj sigurnosti građana i učesnika u saobraćaju. Projekat je finansiran iz budžeta Općine Stari Grad Sarajevo, iznosom od oko 9.000 KM.



Bistrik



Muje Hrnjice



Carina



Maguda čikma



Baruthana



Mjedenica

Muje Hrnjice

Na Hridu, u ulici Muje Hrnjice, saniran je kameni potporni zid dužine oko 20 metara i prosječne visine dva i po do četiri metra. Ovaj projekat uključivao je i zaštitu postojeće padine postavljanjem pletene žičane ograde visine 80 centimetara. Vrijednost investicije ovog projekta bila je oko 20.000 KM.

Maguda čikma

U ulici Maguda čikma broj 6 (MZ Babiča bašča), izgrađen je novi potporni zid dužine 15 metara, kojim je riješen rizik od potpunog urušavanja

starog zida, što bi ugrozilo sigurnost stanovnika i vozila u ovom dijelu ulice. Sanirano je i kaldrmisano gazište uz sami zid, a za ovu investiciju iz budžeta Općine Stari Grad izdvojeno je 17.200 KM.

Mjedenica

U ulici Mjedenica, preko puta broja 37, također je izgrađen novi armirano-betonski potporni zid dužine 12 metara i prosječne visine od pola do dva metra. U sklopu ovog projekta, bila je uključena izrada drenaže i otvora na zidu radi pravilne odvodnje. Vrijednost investicije ovog projekta bila je oko 6.000 KM.



U toku 'utopljavanje' OŠ „Edhem Mulabdić“

Osnovna škola "Edhem Mulabdić" u Starom Gradu jedna je od najstarijih obrazovnih institucija u gradu, a prije nešto više od mjesec dana konačno su počeli radovi na njenoj obnovi, tačnije 'utopljavanju' objekta. Prema informacijama Službe za lokalni razvoj i poslove mjesnih zajednica, radovi se odvijaju prema planiranoj dinamici.

Izvršena je demontaža i uklanjanje svih starih prozora na objektu i postavljeni su novi, a uporedo s tim se izvode unutarnji radovi, ugradnja rigipsa, te farbarsko-molerski radovi kako bi se zidovi osvježili bojom i prostorije dobile novi sjaj.

Projekat je vrijedan 315.000 KM i uključuje zamjenu postojeće stolarije i bravarije, utopljavanje stropne konstrukcije, vanjskog fasadnog zida s unutrašnje strane glavnog objekta, te utopljavanje stropa. Također, planirana je i sanacija, te farbanje vanjske fasade.

Važno je napomenuti da se Osnovna škola "Edhem Mulabdić" nalazi u historijskom urbanom krajoliku Sarajeva, koji je proglašen nacionalnim spomenikom Bosne i Hercegovine. Općina Stari Grad Sarajevo je poduzela sve potrebne korake kako bi se osigurale potrebne dozvole za izvođenje radova, uključujući projektno-tehničku dokumentaciju.

Projekat zajedno realizuju Općina Stari Grad Sarajevo i Ministarstvo za odgoj i obrazovanje KS.



Nova stolarija na objektu

Podrška lokalne zajednice odgojno-obrazovnim institucijama

Osnovna škola "Edhem Mulabdić", smještena u ulici Konak, ima dugu tradiciju kao odgojno-obrazovna ustanova u gradu Sarajevu. Glavna zgrada škole datira još iz 1890. godine, što je čini jednom od najstarijih škola u gradu. Prije tri godine, Općina Stari Grad je uložila skoro 2 miliona KM kako bi finansirala izgradnju moderne nove sportske dvorane OŠ "Edhem Mulabdić". U posljednje četiri godine ovo će biti peti odgojno-obrazovni objekat koji je Općina Stari Grad Sarajevo sanirala i obnovila uz pomoć i podršku partnera: obnovljena je zgrada Muzičke akademije, zamijenjena stolarija, grijanje i obnovljene unutarnje prostorije u Osnovnoj školi "Saburina", izvršeno utopljavanje Osnovne škole "Mula Mustafa Bašeskija", te izgrađen potpuno novi vrtić "Bulbuli".

Stanovnici naselja Borije dobili novu saobraćajnicu



Saniranu 750 metara puta

Naselje Borije nalazi se na istočnoj strani Sarajeva u općini Stari Grad, na nadmorskoj visini od 1.000 metara i pripada mjesnoj zajednici Moščanica. Suprotno uobičajenom mišljenju javnosti da su Borije samo izletišta zbog njihove udaljenosti od centra grada i bogate flore i faune koja se razvila, u ovom naselju nalazi se oko 60 domaćinstava koji na Borijama žive i mahom se bave poljoprivredom i stočarstvom. Naselje je nastalo prije rata i brojalo je svega nekoliko kuća, a poslije rata je doživjelo nagli razvoj i naseljavanje. Ipak, infrastruktura naselja nije bila na zadovoljavajućem nivou, a prvi makadamski put od Obhodže do Borija prokopan je davne 2014. godine, u dužini od 900 metara. Tada je na Borijama sagrađeno i spomen obilježje za 172 šehida i poginula borca 2. brdske brigade 1. korpusa ARBiH koji su bili raspoređeni u tranšejama duž Borija.

Projekat vrijedan 175.000 KM

Stanovnici naselja su prošle godine samoinicijativno pokrenuli projekat proširenja postojećeg puta kako bi se vozila mogla mimoilaziti, a kada su potrošili raspoloživa sredstva i vlastite mogućnosti za dalje radove, za pomoć su se obratili Općini Stari Grad Sarajevo. Put je saniran od ulaza iz naselja Obhodža do spomen obilježja na Borijama, u dužini od 750 metara – najoštećenije dionice, a vrijednost projekta koji se finansirao iz budžeta Općine Stari Grad iznosila je 175.000 KM.

Podrška



Podrška humanitarnim organizacijama i ugroženim kategorijama

Podrška Općine i načelnika Hadžibajrića Narodnoj kuhinji Stari Grad - Tetka Zilha, Crvenom križu Stari Grad, Merhametu, Caritasu Vrhbosanske nadbiskupije Sarajevo i Srpskom građanskom vijeću - Pokretu za ravnopravnost Kantona Sarajevo

U Općini Stari Grad Sarajevo djeluje nekoliko izuzetno značajnih humanitarnih organizacija koje pružanju pomoći onima koji su u stanju potrebe. Općina Stari Grad Sarajevo već godinama podržava ove organizacije u lokalnoj zajednici, pružajući im neophodne resurse poput finansijskih sredstava i prostora za rad. Među organizacijama koje su dobile podršku Općine Stari Grad u 2023. godini su Narodna kuhinja Stari Grad - Tetka Zilha, Crveni križ Stari Grad, Merhamet, Caritas Vrhbosanske nadbiskupije Sarajevo i Srpsko građansko vijeće - Pokret za ravnopravnost Kantona Sarajevo, a sve su one posvećene poboljšanju kvalitete života najugroženijih građana.

Narodna kuhinja Stari Grad - Tetka Zilha

Narodna kuhinja Stari Grad - Tetka Zilha osnovana je 27. marta 1992. godine, u vrijeme kada je Sarajevo bilo pod opsadom, nije bilo hrane i u gradu nije postojala nijedna javna kuhinja koja bi nahranila gladne, bolesne, nemoćne. Nažalost, korisnika i potreba i danas je jako puno, a prema riječima Amira Radeljaša, predsjednika Narodne kuhinje, iz dana u dan sve je veći broj penzionera sa minimalnim primanjima koji pokušaju na njihova vrata. Iako su vrata Narodne kuhinje Stari Grad otvorena za korisnike iz cijelog Kantona Sarajevo, pa i šire, Općina Stari

Podrška Srpskom građanskom vijeću - Pokretu za ravnopravnost KS

U prostorije Srpskog građanskog vijeća KS, dostavljeno je i 30 prehrambenih paketa sa osnovnim životnim namirnicama. Ovoj nevladinoj organizaciji, koja skoro 25 godina djeluje na području Kantona Sarajevo, uglavnom se obraćaju osobe u teškom stanju socijalne potrebe bez ikakvih primanja. Organizacija im pomaže na razne načine, a kako su potvrdili, bez podrške partnera poput Općine Stari Grad, to ne bi bilo moguće.

Grad Sarajevo je jedina lokalna zajednica u Kantonu Sarajevo koja kontinuirano finansira rad kuhinje i na godišnjem nivou za njen rad izdvaja 40.000 KM. I za 2023. godinu osigurana su sredstva, a ugovor o finansiranju potpisali su općinski načelnik Ibrahim Hadžibajrić i predsjednik Narodne kuhinje Stari Grad – Tetka Zilha Amir Radeljaš.

Crveni križ Stari Grad

Općina Stari Grad je i ove godine izdvojila značajna finansijska sredstva za podršku radu Crvenog križa Stari Grad. Načelnik Hadžibajrić i sekretarka Crvenog križa Stari Grad Edina Mirojević potpisali su ugovor o podršci projektima Crvenog križa u iznosu od 20.000 KM.

„Crveni križ radi direktno sa ugroženim kategorijama stanovništva i pomaže tamo gdje je potrebno. Stoga ćemo i ove godine omogućiti da građani koji su u stanju potrebe mogu računati na prehrambene pakete i druge vrste pomoći Crvenog križa Stari Grad,“ poručio je načelnik Hadžibajrić.

Donirano vozilo Caritasu Vrhbosanske nadbiskupije Sarajevo

Općinski načelnik Ibrahim Hadžibajrić uručio je 19.01.2023. godine ključeve vozila Lada Niva ravnatelju Caritasu Vrhbosanske nadbiskupije Sarajevo Mirku Šimiću, a za potrebe rada njihove pučke kuhinje. Prilikom posjete ovoj ustanovi krajem prošle godine, načelnik Hadžibajrić je najavio da će im pomoći da riješe probleme koje imaju sa distribucijom obroka njihovim korisnicima jer im je postojeće vozilo u lošem stanju. Caritas Vrhbosanske nadbiskupije svakodnevno sprema obroke za 150 korisnika o kojima vode brigu, a za 110 porodica u Sarajevu svaki mjesec osiguravaju porodične pakete. Brinu se i o beskućnicima kojih je u njihovoj evidenciji 15 i koji redovno dolaze po svoj obrok. Od ove godine Općina Stari

Grad Sarajevo svakog mjeseca Caritasu isporučuje 20 prehrambenih paketa za njihove korisnike.

MDD Merhamet

Muslimansko dobrotvorno društvo “Merhamet” ima više od 40 punktova javnih kuhinja širom Bosne i Hercegovine u kojima se svakodnevno hrani oko 8.000 osoba. Godišnje se pripremi i podijeli oko tri miliona obroka za socijalno ugrožene kategorije stanovništva kojima je to često i jedini obrok u toku dana. Najveći dio svojih aktivnosti Merhamet realizuje zahvaljujući pomoći donatora i društveno odgovornih kompanija i pojedinaca.

Općinski načelnik Ibrahim Hadžibajrić i ove je godine u budžetu planirao sredstva za podršku Muslimanskom dobrotvornom društvu Merhamet, te je potpisan ugovor o dodjeli granta u iznosu od 10.000 KM koji će biti usmjeren u projekat “Proizvodnja povrća i tjestenine” na Merhametovom imanju u Zavidovićima. Ugovor su potpisali načelnik Ibrahim Hadžibajrić i zamjenik predsjednika Merhameta, Kenan Trebinjac.



Redovne akcije darivanja krvi



Donirano vozilo Lada Niva



Srpsko građansko vijeće KS dobilo pomoć



Projekat Merhameta - proizvodnja povrća

Podrška

Udruženja koja pomažu osobama s posebnim potrebama i njihovim roditeljima dobila podršku Općine Stari Grad

Značajna pomoć i ove godine pružena je udruženjima koja pružaju podršku djeci sa posebnim potrebama. Među tim udruženjima su i Zavod Mjedenica i Servis centar „Dajte nam šansu“, koji su već dokazali svoju predanost i uspješnost u radu s djecom sa posebnim potrebama.

Zavod Mjedenica – besplatni logopedski tretmani

I ove godine će svi učenici osnovnih škola u Starom Gradu, kao i predškolci sa govorno-jezičkim poteškoćama imati mogućnost besplatnih logopedskih tretmana kroz rad sa stručnim osobljem Zavoda „Mjedenica“. Riječ je o projektu koji već 11 godina finansira Općina Stari Grad Sarajevo omogućivši tako djeci i njihovim roditeljima brži pristup i rad sa stručnim licima u rješavanju govorno-jezičkih poteškoća. Projekat je izuzetno važan za što bolji razvoj djece, postizanje boljeg uspjeha u školi i socijalizaciju u društvenoj sredini.

Zavod Mjedenica prosječno godišnje ima između 180 i 200 korisnika. Među njima je i 117 učenika od I do IX razreda, raspoređenih u 32 odjeljenja. Vrtić Zavoda Mjedenica trenutno pohađa 28-ero djece, a radionice za radnu okupaciju imaju 28 korisnika. Korisnici Zavoda su djeca uzrasta od četiri godine, pa do odrasle dobi.

Servis centar „Dajte nam šansu“

Načelnik Općine Stari Grad Ibrahim Hadžibajrić potpisao je sa Ines Kavalec - direktoricom Udruženja „Dajte nam šansu“, ugovor o izdavanju sredstava u iznosu od 10.000 KM za podršku radu i redovnim aktivnostima Servisa centra „Dajte nam šansu“ koji pomaže porodicama i djeci s poteškoćama u razvoju. Osim toga, od ove godine općinski načelnik Ibra-



Dugogodišnja podrška Općine Stari Grad Sarajevo



Pokloni za najmlađe

him Hadžibajrić u Starom Gradu je uveo mjesečnu naknadu u iznosu od 150 KM za lica s poteškoćama u razvoju bez obzira na godine života. Servis centar „Dajte nam šansu“ otvoren je 2017. godine, u prostorijama koje im je ustupila Općina Stari Grad



Zavod ima oko 200 korisnika

koja je finansirala i njihovu adaptaciju. Od prošle godine ovaj Servis centar od Općine dobija i redovni godišnji grant, a kako je kazala Kavalec, od 863 porodice sa djecom s poteškoćama u razvoju koje imaju u svojoj bazi, oko 240 ih je iz Starog Grada.

Ostali vidovi podrške...

Općina Stari Grad kontinuirano pokazuje svoju predanost podršci osobama s posebnim potrebama. Već 11 godina iz budžeta izdvajaju se sredstva za podršku učenicima sa govorno-jezičkim poremećajima u Zavodu Mjedenica. Prije pet godina finansirano je opremanje Senzorne sobe, koju koriste osobe sa poremećajem senzorne integracije.

Zgrada Zavoda Mjedenica je 2013. godine dobila novu fasadu i stolariju kroz projekat energetske efikasnosti. Finansiranje od 500.000 dolara je obezbijedila Evropska komanda američkih snaga (US EUCOM) putem svog Ureda za saradnju u oblasti odbrane pri ambasadi SAD-a u BiH, a na preporuku Općine Stari Grad. Također, 2014. godine Općina Stari Grad i Fondacija "Asmir Begović" su zajedno izgradili sportsko igralište za Zavod Mjedenica.



Podrška u iznosu od 10.000 KM



Servis centar otvoren 2017. godine



U Starom Gradu otvoren prvi Think Pink Centar u BiH

Osnaživanje žena oboljelih od raka dojke ● Otvorena vrata za sve oboljele žene iz BiH ● Prostorije u neposrednoj blizini Katedrale

Zene oboljele od raka dojke koje su se do sada suočavale sa problemima nedostatka adekvatne psihosocijalne podrške, konsultacija sa medicinskim stručnjacima, psiholozima, nutricionistima, bez obzira gdje žive i da li imaju zdravstveno osiguranje, od sada imaju otvorena vrata u prvom Think Pink Centru u BiH koji je otvoren u Općini Stari Grad, u neposrednoj blizini sarajevske Katedrale. Centar su zvanično otvorili općinski načelnik Ibrahim Hadžibajrić i direktorica Organizacije Think Pink-Zajedno smo jedno Nela Hasić.

Kako je istakla Hasić, Centar ne bi bio otvoren da nije bilo razumijevanja i dobre volje načelnika Hadžibajrića koji je spremno prihvatio njihovu ideju i osigurao prostor za otvaranje Centra u najužoj gradskoj jezgri, koji je površine 122 m². U novim prostorijama će žene imati sve potrebne usluge, ali i mogućnost za one žene koje dolaze iz drugih gradova, da uz prethodnu najavu i dogovor, imaju smještaj i boravak između pregleda, a sve će usluge biti besplatne. Sve usluge koje Centar bude pružao bit će u skladu sa evropskim i svjetskim smjernicama i preporukama, a ženama će biti na raspolaganju i određeni broj silikonskih proteza.

Podrška i za Roditeljsku kuću

Općinski načelnik Ibrahim Hadžibajrić i direktor Udruženja "Srce za djecu oboljelu od raka" Fikret Kubat potpisali su Ugovor o namjenskom grantu, a Općina će za nesmetano djelovanje Roditeljske kuće u Sarajevu, koju je pokrenulo ovo udruženje 2016. godine, ove godine osigurati ukupno 25.000 KM. Ovaj objekat namijenjen je pružanju kontinuiranog smještaja za djecu oboljelu od raka i njihove porodice, koje dolaze izvan Sarajeva.



Nove prostorije na Trgu fra Grge Martića

"Nakon 20 godina naših aktivnosti, uticaja na društvo i promjena koje smo donijeli, spašenih života kroz preglede koje smo omogućili, danas se se ostvaruje naš san i otvara Think Pink Centar za koji moram istaći da ne bi postojao bez dobre volje Općine Stari Grad Sarajevo na čelu sa načelnikom Hadžibajrićem i cijelim njegovim timom koji su



Pomoć i podrška za sve žene

nam osigurali prostor i uvijek bili na raspolaganju," istakla je Hasić.

"U Starom Gradu otvaramo prvi Think Pink Centar za osnaživanje žena oboljelih od raka dojke i prevenciju ove bolesti i šaljemo poruku svim ženama da više nisu same i da ovdje mogu doći po savjet, pomoć, podršku, lijepu riječ," poručio je načelnik Hadžibajrić.

Obrazovanje

Ove godine stipendira se 389 učenika i studenata i izdvaja više od 600.000 KM

Stipendisti iz Starog Grada imaju najviše stipendije u državi • 200 KM za studente i 150 KM za učenike • Podrška učenicima starih zanata i deficitarnih zanimanja

Općina Stari Grad Sarajevo nastavlja s nesebičnim ulaganjem u mlade i njihovo obrazovanje.

U skladu s vizijom i opredjeljenjem za podršku obrazovanju mladih sugrađana, načelnik Općine Stari Grad Sarajevo, Ibrahim Hadžibajrić, u budžetu za ovu godinu planirao je uvećane stipendije za učenike i studente. Iznosi stipendija u Starom Gradu sada su najveći u BiH, tako da učenici mjesečno dobijaju 150 KM, a studenti 200 KM.

Ukupno se iz budžeta za ove namjene izdvaja 603.000 KM za 389 učenika i studenata iz boračkih porodica, izuzetno nadarenih učenika i studenata, te učenika deficitarnih zanimanja.

Stipendije djeci boračke populacije

Općina Stari Grad Sarajevo će u školskoj 2022/23. godini stipendirati ukupno 218 djece iz boračke populacije koji su ispunili uslove propisane javnim konkursom. Među stipendistima se nalazi 106 učenika i 112 studenata. Općinski načelnik, Ibrahim Hadžibajrić, potpisao je ugovore sa stipendistima i izrazio svoje zadovoljstvo što će njihov trud i zalaganje biti nagrađeni stipendijama. Načelnik Hadžibajrić je istakao da je ulaganje u obrazovanje ove djece ulaganje u budućnost svih nas i da je ponosan što Općina Stari Grad Sarajevo može doprinijeti njihovom uspjehu.

Stipendije nadarenim učenicima i studentima i učenicima deficitarnih zanimanja

Općinski načelnik Ibrahim Hadžibajrić potpisao je ugovore i sa 171 nadarenim



Sa potpisivanja ugovora sa stipendistima

učenikom i studentom, kao i onima koji se bave deficitarnim i tradicionalnim zanatima. Ukupni iznos za ove stipendije ove godine iznosi 258.300 KM.

Stipendije za buduće zlatare-draguljare, tapetare, automehaničare...

Sve je veća potražnja, kako u BiH, tako i drugim evropskim zemljama za kvalitetnim kadrom iz oblasti deficitarnih zanata. Kako bi podstakli mlade da se opredjeljuju za zanate, Općina Stari Grad Sarajevo već sedmu godinu zaredom osigurava im stipendije. To je razlog i zašto su njihove stipendije u istom rangu kao i studentske i iznose 200 KM mjesečno. Ove godine takvih stipendista je osam i to za zanimanja: zlatar-draguljar, pomoćni dekorater, automehaničar, poslastičar (x2), elektroenergetičar, krojač i tapetar.



150 KM za učenike i 200 KM za studente



Ulaganje u obrazovanje mladih



Najbolji studenti iz Starog Grada – zlatne i srebrene značke Univerziteta u Sarajevu, dobili nagrade i priznanja

Praksa nagrađivanja najboljih studenata uvedena prije 5 godina i dosad je ukupno 55 studenata iz Starog Grada dobilo ova priznanja

Da je Općina Stari Grad Sarajevo lokalna zajednica koja brine o mladima i nagrađuje njihov trud, rad i zalaganje pokazalo se i kada je općinski načelnik Ibrahim Hadžibajrić ugostio 14 studenata Univerziteta u Sarajevu koji su dobitnici zlatnih i srebrenih znački. Za izuzetne rezultate i visok prosjek ocjena za vrijeme prvog ili drugog ciklusa studija načelnik Hadžibajrić studentima je uručio plakete i novčane nagrade. Praksu nagrađivanja najboljih studenata Općina Stari Grad uvela je prije 5 godina i dosad je ukupno 55 studenata iz Starog Grada dobilo ova priznanja - 10 zlatnih i 45 srebrenih znački i za te namjene je iz budžeta izdvojeno 18.500 KM.

Uručenju nagrada i plaketa prisustvovao je i predsjedavajući Općinskog vijeća Stari Grad Seid Škaljić.

„Vi ste ponos Općine Stari Grad i želim da nastavite biti tako uspješni jer takvi mladi ljudi trebaju ovoj zemlji. Među vama su budući pravници, ljekari, pedagozi i nadam se da ćete vi biti promjena koja nam treba,“ poručio je načelnik Hadžibajrić studentima.

Studenti poručili: Ne namjeravamo otići iz BiH!



Priznanja za 14 studenata

Među nagrađenim studentima iz Starog Grada su i dvije studentice sa priznanjem zlatna značka: Emina Kukuljac i Enida Dučić, obje diplomatice Pravnog fakulteta u Sarajevu.

„Upisala sa II ciklus na Pravnom fakultetu, Katedra krivično pravo. Svaka vrsta podrške nam pomaže, nije toliko presudan finansijski aspekt, koliko nam je bitno da neko prati, cijeni i nagrađuje naš rad. Namjeravam ostati u BiH, već radim u struci. Smatram da je moguće pronaći kvalitetan posao ovdje ukoliko se dovoljno potrudimo i pokažemo naše vještine,“ poručila je Emina Kukuljac.

Dobitnici zlatnih i srebrenih znački

Dobitnici Zlatnih znački iz Starog Grada su: Emina Kukuljac I ciklus - DIPLOMANT Pravni fakultet Sarajevo i Enida Dučić - I ciklus – DIPLOMANT Pravni fakultet Sarajevo.

Dobitnici Srebrenih znački: Sanin Delalić – I ciklus DIPLOMANT, Pravni fakultet Sarajevo, Džejlana Alić – I ciklus DIPLOMANT Pravni fakultet Sarajevo, Amra Avdić– I ciklus DIPLOMANT Pedagoški fakultet Sarajevo, Faruk Cikotić– I ciklus DIPLOMANT Pravni fakultet Sarajevo, Indira Šorlija – I ciklus DIPLOMANT Filozofski fakultet Sarajevo, Mirza Hasić – I ciklus DIPLOMANT Pravni fakultet Sarajevo, Ilma Latić - II ciklus, MAGISTRANT Pedagoški fakultet Sarajevo, Amra Arapović– II ciklus MAGISTRANT Fakultet sporta i tjelesnog odgoja Sarajevo, Said Kamenica – II ciklus MAGISTRANT Filozofski fakultet Sarajevo, Hana Salihović – II ciklus MAGISTRANT Muzička akademija Sarajevo, Amina Zahiragić– Integrirani studij DOKTOR MEDICINE Medicinski fakultet Sarajevo, Amir Merdović – Integrirani studij DOKTOR MEDICINE Medicinski fakultet Sarajevo.

Podrška

Bezrezervna i konstantna podrška talentovanim sportistima i sportskim kolektivima

Podrška za individualne sportiste i sportske kolektive ● Država BiH, ukoliko želi vrhunske sportske rezultate, mora zakonski regulirati finansiranje sporta ● Općina Stari Grad želi oživjeti legendarni sarajevski Košarkaški klub „Bosna“

Općina Stari Grad Sarajevo je lokalna zajednica koja je odavno prepoznala važnost sporta i sportskih aktivnosti za građane, a posebno za mlade osobe. U nedostatku jasne zakonske regulative na nivou države koja bi osigurala redovno finansiranje uspješnih sportista i sportskih kolektiva, načelnik Hadžibajrić i Općina Stari Grad dugi niz godina na razne načine i u okviru svojih mogućnosti podržavaju sport.

Mlada skijašica Melika Jažić dobila ski opremu

Šesnaestogodišnja Melika Jažić je skijašica, članica reprezentacije BiH i Skijaškog kluba „Širokača“, a njena specijalnost je skijaško trčanje. Do sada je zabilježila 12 nastupa za reprezentaciju Bosne i Hercegovine, a ove godine je u organizaciji Olimpijskog komiteta Bosne i Hercegovine bila član državne reprezentacije u skijaškom trčanju na EYOF-u 2023. godine, održanom u Italiji. „Ponosan sam što je Stari Grad prepun talentovanih mladih sportista, pogotovo u pojedinačnim sportovima. Melika definitivno spada u tu grupu i zbog toga zaslužuje podršku svoje općine. Odlučili smo da Meliku osiguramo za narednu skijašku sezonu. Općina će Meliki osigurati potrebnu ski opremu“, poručio je načelnik Hadžibajrić.

Podrška za Karate klub „Bašćaršija“

KK „Bašćaršija“ osnovan je 2018. godine, a za vrlo kratko vrijeme postao je jedan od najuspješnijih karate klubova u zemlji. I za ovu godinu, Općina Stari Grad izdvaja značajna finansijska sredstva za



Reprezentativka Melika Jažić dobila podršku



KK "Bašćaršija" jedan od najuspješnijih klubova u zemlji

njihov rad u iznosu od 10.000 KM. „Karate klub ‘Bašćaršija’ okuplja desetine djece, što je pravi uspjeh. Djeca vrijedno treniraju, korisno i zdravo provode svoje

slobodno vrijeme uz sport, a neki od njih su postali i vrhunski takmičari, sa brojnim medaljama na državnim i međunarodnim takmičenjima.

Općina Stari Grad želi povratak simbola sarajevskog sporta KK „Bosna“

Općina Stari Grad izdvojila je 20.000 KM za podršku radu i sportskom napretku Košarkaškog kluba „Bosna Meridianbet“. Ugovor o namjenskom grantu sa načelnikom Hadžibajrićem potpisao je predsjednik Upravnog odbora ovog kluba Almir Bradić. Na ovaj način Općina želi pomoći da se KK „Bosna“, simbol Sarajeva i cijele Bosne i Hercegovine vrati tamo gdje pripada – u sami vrh bosanskohercegovačke i regionalne košarke.



KK "Bosna Meridianbet" dobio podršku Općine

Vrhunski rezultati karate šampionki Nejre i Emine Sipović ne prolaze neopaženo

Karatistkinja Nejra Sipović je na Evropskom prvenstvu za kadete, juniore i mlade seniore na Kipru, osvojila zlatnu



Emina Sipović sa ocem i trenerom Zijadom

medalju. Njena sestra Emina Sipović se nalazi na prvom mjestu svjetske rang liste, te je najbolja juniorka svijeta zbog odličnih rezultate ove godine. „Vi svojim rezultatima pokazujete koliko ova zemlja

ima uspješnih i talentovanih mladih ljudi i ne sumnjam da je pred vama blistava budućnost. Zaslužujete našu podršku“, kazao je načelnik Hadžibajrić, te im uručio finansijske nagrade.

Penzioneri nisu zaboravljeni: 45.000 KM za nabavku lijekova

Načelnik Općine Stari Grad Ibrahim Hadžibajrić i predsjednik Udruženja penzionera Stari Grad Kasim Halak potpisali su Ugovor o namjenskom grantu u iznosu od 45.000 KM, koji će biti iskorišten za nabavku lijekova za penzionere koji primaju minimalne penzije i koji su članovi Udruženja. S obzirom na rastuće životne troškove i veliki broj penzionera s minimalnim primanjima, načelnik Ibrahim Hadžibajrić najavio je dodatnih 15.000 KM za pomoć penzionerima u Starom Gradu. Time će ukupan iznos za pomoć penzionerima u ovoj godini biti 60.000 KM.

Podrška i za aktivnosti osoba treće životne dobi

Centar za promociju i unapređenje zdravlja Općine Stari Grad, kojim upravlja Udruženje Generacija, predstavlja značajnu podršku za građane Kantona Sarajevo već šest godina. Ovaj Centar postao je omiljeno okupljalište osoba treće životne dobi, nudeći im brojne aktivnosti i usluge koje pomažu unaprijediti njihovo zdravlje i kvalitet života. Ove godine, Centar je dobio redovni godišnji grant od 20.000 KM za projekte i aktivnosti. Načelnik Hadžibajrić je istakao da



Podrška penzionerima koji primaju minimalne penzije

je zajedno s predsjednikom Udruženja Generacija, Mahirom Selmanovićem, pokrenuo ovaj servis, te da je ponosan na pozitivan uticaj koji je imao na zajednicu. Sreća i zadovoljstvo koje ovaj Centar pruža svojim članovima i korisnicima, najbolja su nagrada za sve napore i ulaganja koja su uložena u njegov rad.

Obilježavanje

Ramazan u Starom Gradu – posebna atmosfera i doživljaj




Ramazan u Starom Gradu i ove godine je po mnogo čemu bio poseban. Svečano ukrašene ulice starogradske jezgre povodom ramazana doprinijele su da ugođaj i atmosfera za ramazan budu ljepši nego ikada, a brojni građani i turisti iskoristili su taj motiv na svojim fotografijama sa Baščaršije.

Da Ramazan u Starom Gradu bude poseban doprinijeli su i pokloni koje je Općina Stari Grad Sarajevo obezbijedila za građane. Uoči ramazana svi koji su se zadesili na Baščaršiji dobili su prigodne

poklon pakete hurmi, čestitke i ramazanske vaktije.

A, 20. aprila, su građanima povodom predstojećeg Bajrama ponovo podijeljeni prigodni pokloni, uz bajramsku čestitku. Uz svaku čestitku, građani su dobili cvijet i knjige bosansko-hercegovačkih autora sa tematikom Sarajeva i njegovog kulturno-historijskog naslijeđa, ali i temama iz ne tako davne prošlosti i sudbine koja je ovaj grad zadesila u periodu agresije, a koja dokazuje da je ovo Grad heroj.





| Naziv institucije | Telefon |
|--------------------------------|------------------------|
| Policija | 122 |
| MUP Stari Grad | 033/ 532-000 |
| Hitna pomoć | 124 |
| Vatrogasci | 123 |
| Taxi Sarajevo | 1515 |
| Turistički informativni centar | 033/ 532-606 i 580-999 |
| Info centar Općine | 033/ 233-184 |
| Mjesne zajednice | 033/ 265-526 |
| Porezna uprava | 033/ 555-481 |
| Apoteka „Baščaršija“ | 033/ 272-300 |
| Biro Stari Grad | 033/ 557-247 |
| Općina Stari Grad Sarajevo | 033/ 282-300 |

| Općinska služba | Telefon |
|---|-------------|
| Služba kabineta općinskog načelnika | 033/282-400 |
| Općinsko vijeće | 033/282-313 |
| Služba za odnose s javnošću i informacione sisteme | 033/282-491 |
| Služba civilne zaštite | 033/282-395 |
| Služba za investicije i komunalne poslove | 033/282-417 |
| Služba za urbanizam | 033/282-316 |
| Služba za imovinsko-pravne, geodetske poslove i katastar i stambene poslove | 033/282-335 |
| Služba za boračko-invalidsku i socijalnu zaštitu | 033/282-397 |
| Sektor za tehničke poslove i obezbjeđenje | 033/282-452 |
| Služba za opću upravu i inspeksijske poslove | 033/282-357 |
| Služba za finansije | 033/282-427 |
| Služba za privredu | 033/282-359 |
| Općinsko pravobranilaštvo | 033/282-371 |
| Služba za obrazovanje, kulturu i sport | 033/282-365 |
| Služba za lokalni razvoj i poslove mjesnih zajednica | 033/265-525 |

-  Informacije
-  Policija
-  Parking
-  Prva pomoć
-  Toalet
-  Pošta
-  Banka



BAŠČARŠIJA JE BILA NAJSRETNIJE MJESTO U BIH

Kad vidiš dimnjačara, uhvati se za dugme i poželi želju - kaže staro vjerovanje, a ako je suditi po tome, Baščaršija je 06.05.2023. godine bila naj sretnije mjesto u Bosni i Hercegovini, a možda i šire. Stotine dimnjačara okupili su se na Baščaršijskom trgu gdje je, u okviru Dana Općine Stari Grad, otvoren Prvi internacionalni festival dimnjačara u Bosni i Hercegovini.